

甲 236

江兆銘
庚戌
被
逮
供
詞

23:616.85
20

汪兆銘供辭

汪兆銘別號精衛前在東京留學時曾為民報主筆生平宗旨皆發之於民報可不多言丁未年孫逸仙起事時兵敗後攜炸藥軍器等出我潛以此等物件納入書篋內寄存友人處後復在南洋各埠演說聯絡同志繼思於京師根本之地為震奮天下人心之舉故來又自以平日在東京交遊素廣京師各處熟人頗多不易避面故聞黃君映相館之設即以三百圓入股至京居其家黃君等皆不知精衛目的所在相處月餘後見精衛行止可異頗有疑心故映相館中有人辭去至於今日



忽聞介言映相館有事故即往閱知事發不忍連累無辜故復回屬擬留書黃君自白未至屬遂被收捕自被逮以來詰者或曰今中國已立憲矣何猶思革命而不已嗚呼為此言者以為中國已有長治久安之本而不知其危在旦夕也自吾黨人觀之則數年以來其益吾民之悲痛而不可一日安者固未少減於曩昔日以加甚者也今之持立憲之說者以為立憲則必平滿漢之界而民族之主義目的可以達立憲則必予民以權而民主主義之目的可以達如是則雖君主立憲奚不可以即於治以吾黨人論之姑勿論所謂平滿漢之界

與所謂予民以權者為果有其實否即以君主立憲之制而言其不能達濟國之目的可決言也談法理者每謂君主僅國家之最高機關有憲法以範圍之則君主無責任而不可侵犯故君主立憲未嘗不可以治國此於法理則然矣以事實按之而有以知其不然也大抵各國之立憲無論其為君主憲為民主立憲皆必經一度革命而後得之所以然者以專制之權力積之既久為國家權力發動之根本非摧去此強權無由收除舊布新之效故也法國當路易十六即位之初蓋已幾樹立憲君主政體矣而後卒不免於大革命其故實由於

此此非惟民主國之法國為然以君主國言若英所謂
憲法之母者也若德若日本所謂君主立憲政體之強
國者也今之言立憲者多祖述之其亦嘗一按此三國
之歷史乎英國無成文憲法其所謂權利請願與所謂
大憲章者實由幾度革命所造成其憲法發達之歷史
蓋遞遷疊變以至於今日者法學者謂英國之國體雖
曰君主制而以其政治而論實為民主政治非虛語也
德國之憲政由日耳曼諸邦自治制度夙已發達足以
為其根本若君主立憲之制可行之而無礙至於日本
則所謂最重君權之國也其憲法上君主之大權遠非

德國可比微論英國今中國之言憲政者或謂宜以日本為法或謂其君主大權過重戾於法理為不足學吾以為前說固無足論即後說亦徒為法理之空談非事實之論也夫謂日本憲法君主大權最重者於法理上則然耳至於事實則大權固不在君主也維新以前幕府專制天皇僅擬虛位是故倒幕之役實為日本政治上之大革命西鄉隆盛以兵東指德川幕府以兵迎降政治上之大權已移於維新黨之手於是德川歸政天皇總攬大權要其實則天皇高拱國事皆取決於倒幕黨之手是故日本之憲法以法文而言則大權總攬於

君主而以歷史而言則其國家權力發動之根本固已
一易而非其故矣今以此三國立憲之成迹衡之中國
乃無一相類既非如英國憲法之以漸發達又非如德
國有自治制度以為根本而又非如日本之曾經廢藩
倒幕之大革命夫立憲所以鞏固君主之大權上文已
言之矣而國會者即為此大權所孕育而生如嬰兒之
仰乳哺得之則生不得則死如是之國會而欲其能與
政府爭權限以為人民之代表庸有望乎吾敢斷言國
家權力發動之根本未有所變易而貿貿然開國會以
生息於君主大權之下者其結果不出三種一曰國會

為君主之傀儡前此之土耳其是也土耳其嘗立憲矣其憲法悉模仿歐洲君主立憲國條文頒布之後以親倭之臣組織內閣以各省總督為上議院議員以阿附朝廷之小人為下議院議員粉飾苟且殆一場戲劇未幾新內閣頽然而倒而國會亦閉歇不復開至昨歲而有少年土耳其黨之大革命二曰國會為君主之魚肉今之俄羅斯是也俄自與日本戰敗後迫與民變不得不立憲其憲法條文之完善較之憲法大綱相倍蓰也其政黨之強立較之今日請開國會者之兒戲相霄壤也其憲法由民黨數十年血戰所購得較之今日所謂

立憲又不可同日而語也然而國家權力發動之根本無所變易國會終不能與政府之威權相敵故自有國會後以持正議之故屢被解散議員之逮捕者纍纍不絕膿血充塞之歷史如故革命之風潮亦急激如故三曰國會為君主之鷹犬今之安南議會是也安南隸屬於法法欲苛斂其民而慮以是激民乃開議會以安南人之有資望者為豪傑員為會同員每欲加稅輒開議會使議決號於眾曰此議會所議決也故安南之有議會實為法國官吏之鷹犬協力以搏噬其人民者也由是觀之即如請願國會者之所期其結果不出此三者

請願諸人其果有樂於是乎醉虛名而忘實禍其罪實
通於天也立憲之不可望如此以故革命諸人以為欲
達民主之目的舍與政府死戰之外實無他法此實革
命黨所久已決議者也若夫避戰爭之禍而求相安之
法則前此黨人下缺一憲政體則民族主義與民權主
義之目的皆可以達而戰爭之禍亦可以免誠哉言也
或有慮此為不利於滿人者不知果不言立憲則已如
其立憲則無論為君主國體為民主國體皆不能不以
國民平等為原則謂民主國體為不利於滿人者非篤
論也或有慮此為不利於君主者然以較諸鼎革之際

其利害相去當如何歷史所明示不待詳言也所謂願汝生生世世勿在帝王家及所謂汝奈何生我家者其言抑何慘也設不亡於漢人而亡於鄰國則法之待安南與日本之待朝鮮視去其國王如一敝屣而其國王乃日仰鼻息以求活也以較之日本德川幕府奉還大政身名俱泰者其相去何如乎上之所言於國內現象略陳之矣至於國外之現象其足使中國一亡而不可復存一弱而不可復強者尤令人驚心怵目而不能一刻以安國人於庚子以來頗知敵國外患之足懼至於今日反熟視若無所駭此真可為痛哭者也夫中國自

甲午戰敗以來所以未至於瓜分者非中國有可以自全之道特各國平均勢力之結果而已庚子之役俄國乘勢進兵於東三省久駐弗撤實啟瓜分之局日本以均勢之故遂與之戰戰役既終而各國之形勢為之一變前此英日同盟與俄德法同盟相對抗迨日俄戰後而有日俄協約有日法協約有英俄協約所謂協約國而言之實協以謀中國而已前此欲謀中國而各國自顧其利害勢有不均遂相衝突而出以戰今則鑒於戰禍而以協約為均勢之不二法門一旦各國勢力平均則保全瓜分惟其所願顧所以苟延至今者以英法慮

德為之梗而日本又慮美國之議其後也。比年以來日
美之衝突日以彌甚。數月前且有日美開戰之說。而英
日美同盟之議。豁然大起。日本新聞從而論之曰。日美
英同盟成立。則可以制支那。老大帝國之死命。其謀我
之亟。有若是也。夫美富而日強。兩國雖各懷敵意。終不
敢遽如日俄之肇釁。則其彼此利害衝突之點。終必以
協商定之。誠使英德法俄美日對於中國之均勢政策
略定。則自甲午以來。中國所賴以苟安偷活者。至是已
失其具保。全在人分割。在人有為波蘭之續而已。分割
之慘。夫人而知之矣。抑亦知所謂保全者。其實禍無異。

於分割國不能自立而賴保全於人已失其所以為國
人為刀俎我為魚肉此所謂一亡而不可復存一弱而
不可復強者也識者有憂於此乃渴望清美同盟夫同
盟之目的在於互相扶助也故有兩強國同盟者而決
無以強國與弱國同盟者以強國而與弱國同盟是必
強者以同盟為餌而釣此弱者也前此之清俄同盟是
其例矣夫國不自強萬無可以與他強國同盟之理而
非於國家權力發動根本上有大變革又無可以自強
之理愛國者可由此以知其故矣今之談國事者不以
此為憂而顧以邇來中國與外國交際其體面較優於

前遂怡然用以自慰夫曩者中國所以不見禮於外國者以其有賤外排外之思想然雖如是而俄人固嘗以深情厚貌相親而因以攫得大利矣今中國人之思想已由賤外排外一轉而為媚外而各國之智孰不如俄知中國之所重者不在主權不在土地人民而惟在體面遂亦競以深情厚貌相結以期外交上之圓滑而中國之人遂以沾沾自喜間有一二小小權利得微倖爭回則尤大喜欲狂而於外國之協以謀我瞠乎若無所見此真燕雀巢於屋梁而不知大廈之將傾也此無他由人人心目中以為今已豫備立憲凡內治外交諸問

題皆可藉以解決醉其名而不務其實如相飲以狂藥
猥日期以八年迢迢八年之後中國之情狀其有不忍
言者矣由此言之則中國之情勢非於根本上為解決
必無振起之望及今圖之其猶未晚斯則後死者之責
也

附覺羅紹昌奏請將監禁人犯汪兆銘等開釋摺
開去國務大臣司法大臣臣覺羅紹昌等謹奏為黨禁
既開擬將臣部監禁因犯政治革命嫌疑人犯請旨悉
予釋放恭摺仰祈聖鑒事宣統三年九月初九日內閣
奉上諭資政院奏請速開黨禁以示寬大而固人心一

摺所有戊戌以來因政變獲咎與先後因犯政治革命嫌疑懼罪逃匿者悉赦其既往俾齒齊民等因欽此跪聆之下仰見朝廷寬大為懷與民更始之至意感悚莫名伏查宣統二年三月二十日軍機大臣字寄奉上諭民政部會奏拏獲要犯請旨嚴懲一摺汪兆銘黃復生著交法部永遠牢固監禁羅世勛牢固監禁十年餘依議欽此遵旨寄信前來並由民政部鈔交原摺到部當經遵照分別辦理在案竊維比年以來時事艱鉅憤時嫉俗之士倡言改革政治原出於熱誠愛國其心本屬無他我皇上廓然大公咸與維新在逃諸人尚予赦

其既往則凡因犯此項嫌疑監禁在先者自無不在聖
慈曲宥之中臣部仰體朝廷德意謹就監禁人犯逐起
調查竊見汪兆銘等一案情罪似出有因旋即片行民
政部咨取全案卷宗詳細覈閱所有原供罪狀實係因
犯政治革命嫌疑致罹法網在汪兆銘等以改良急進
之心致蹈踰越範圍之咎其迹雖近憤嫉而當日朝廷
不忍加誅亦實以其情尚可原冀有被濯自新之日乃
者幸際聖明俯從輿論一眚之玷不咎厥初與海內相
見以誠凡既往獲咎者同邀特赦合無仰懇天恩俯准
將此案監禁人犯汪兆銘及黃復生羅世勛等悉予釋

釋放如蒙俞允即由臣部遵奉施行此外如有應行查辦之犯臣部自應隨時查明遵旨辦理並通飭各省凡係類於此項人犯無論在監在配一體分別查辦以示寬大而廣皇仁所有因犯政治革命嫌疑監禁人犯請旨悉予釋放緣由謹恭摺具陳伏乞皇上聖鑒訓示謹奏
宣統三年九月十六日

開去國務大臣司法大臣 臣覺羅紹昌


左 侍 郎 臣沈家本

右 侍 郎 臣王 埏

再臣等查閱汪兆銘親供所開各節指陳政治得失發

揮立憲精神洋洋數千言並無狂悖之語抑且熟誠苦
志時流露於公庭對簿之間似此舊學新知實屬不可
多得其才可用其志可悲倘蒙天恩釋放加之驅策當
更感激聖慈濯磨自效謹鈔錄汪兆銘親供一分恭呈
御覽應如何棄瑕錄用之處出自聖裁謹附片陳明請

旨
宣統三年九月十六日



紙三、25、2、1、10000

